

欽定平定教匪紀略

欽定平定教匪紀畧卷十六

十一月初二日丑方受疇奏言臣查南岸開封

歸德與北岸近賊之處僅隔一河亟需籌畫萬

全俾無竄逸查賊匪現在北岸必須處處設備

使其無隙渡河則南岸自可無虞現在江南徐

州鎮總兵沈洪已由曹縣拔營前進山西大同

鎮總兵張績亦帶兵來至邊界臣查河北懷慶

府屬之清化鎮最爲扼要晉省之兵必須駐紮
該鎮江省之兵則必須駐紮考城及蘭陽地方
始爲得力臣已咨照百齡衡齡辦理至汴梁省

城臣督同城守尉西格等帶領滿漢兵丁稽查

嚴密現在南陽鎮總兵呢瑪善帶兵五百名在
蘭陽擇要駐紮其汝寧南陽許州交界處所並
派汝寧營叅將托謨爾權領兵駐紮以爲犄角

倘賊匪潰散南竄

臣

卽帶兵迎頭截剿再歸德

府屬與曹考對岸水已斷流徒步可涉前經派

兵二百餘名同該地方官所僱鄉勇一千四百

名分佈堵禦尚恐不敷現復於漫口一帶添派

河兵一百名並鄉勇六百名協力駐守嚴禁上

游船隻不許下赴江境足杜匪蹤偷越至虞城

縣之董家口及江境楊家集豐縣等處均經百

金匱要略卷之二十一
二
齡佈置周密

臣

惟有會同百齡不分畛域悉力

固守以杜竄逸再

臣

欽奉

諭旨將省城存貯礮位運赴軍營以便攻城之用查

前次撫標官兵前赴濟縣先經張拱辰帶去礮

二十尊又挑選大礮八尊運交高杞軍營並運

貯衛輝分局四尊以備調用此外存城礮位雖

多緣年久鏽損多不適用

臣

到省後挑選礮六

十位安設各處城門又挑選利用礮五十位親赴城外驗試並飭營員逐日演放已能致遠現卽於此內選擇得勝威遠大礮八尊派委委員運赴衛輝飭令同前此解存大礮四尊一併迅解軍營備用奏入

上命軍機大臣傳諭方受疇曰現在滑縣屯聚之賊經大兵尅期進剿恐該匪等亡命奔竄該省黃河

南北地方均關緊要著方受疇嚴飭文武員弁加
意防範毋令稍有竄逸再本日續據董悃太供出
河南朱仙鎮賊目劉成章手下徒弟甚多劉成章
係賊首李文成義子朱仙鎮距省城不過數十里
並著方受疇留心防範慎密訪緝毋稍疎虞

是日戶部等部奏言據河南巡撫方受疇奏到
籌辦軍需事宜各款臣等謹查照定例逐款詳

議此內除官兵酌借行裝銀兩並應付官兵車馬馱騾及添設塘站增製器械酌給局書工食等五款應照議准行外其剿防官兵支給鹽菜並口糧折銀一款查本省派調滿洲綠營進剿官兵及防守兵丁祇應照例支給口糧不得照隔省官兵之例支給鹽菜豫省現在有糧可支亦未便援照直隸之例折給銀兩又招募壯丁

一款查該士民等團練技勇守望相助祇可聽其自便若口糧號衣器械等項悉由官爲辦理不特經費不貲且人數聚散無常亦復無所稽考殊形輻輳又挑修城池一款查該撫摺內旣稱各城垣殘缺處所已飭各州縣趕緊捐修其護城池濠亦應飭令自行籌辦不得糜帑借支又支給車驟腳價請照新野以南成案一款查

此次剿捕教匪雇用車騾係在新野以北車騾脚價自應按照新野以北舊案辦理不得援照新野以南之案致涉浮多此四款均無庸議

戶部又奏言據山東巡撫同興奏到籌議軍需章程各款查此次直隸山東交界處所賊匪滋事一切軍需事宜自應畫一辦理今該撫摺內所稱購備軍裝器械鉛彈火藥並給發官兵口

糧行裝以及採買米麥豆草暨兵丁沿途折給口糧等款遵照定例及奏准成案辦理自應准其照辦外至所稱各州縣雇募民夫日給口糧一款查前此直隸河南先後具奏俱經飭駁有案東省所請名異實同應毋庸議其各州縣雇備車驟安設馬撥及挑濬城濠等款臣部已於議覆河南軍需條款摺內分別准駁應卽令該

撫查照道辦以歸畫一奏入

上從之

同日董誥等奏審明從逆案犯將李鳳印等十三犯核其情罪分別尤重次重又次重之不同開單呈

覽除邊文良卽邊常兒韓達子張昆孫發尚有應行質訊之處暫行監禁待質外請將李鳳印卽李

秋兒劉三卽劉丫頭果鳳魁卽果拴兒鄭八卽
鄭漢魁祝玉劉進得卽劉俊德王老朱大卽朱
六套宋文登九犯卽行凌遲處死其前此留禁
待質十二犯內除董綱太屈四祝林劉輩兒李
玉隴田馬兒六犯仍暫留待質外其太監閻進
喜及張泳貴卽二禿子金黑董伯營賀起雲祝
秉仁六犯與未獲各犯無可質証或已待質有

人毋庸再行留禁應請卽凌遲處死同前經審
出從逆自斃應行剉屍之孫泳貴張以幅二犯
一併梟示得

旨閔進喜張泳貴卽二禿子李鳳印卽李秋兒劉三
卽劉丫頭果鳳魁卽果拴兒鄭八卽鄭漢魁祝玉
劉進得卽劉俊德金黑王老朱大卽朱六套董幗
雲卽董伯營賀起雲祝秉仁俱著卽凌遲處死朱

文登著改爲斬決孫泳貴張以幅著卽劉屍一併
梟首示衆餘依議

十一月初三日丙寅那彥成高杞楊遇春奏言竊

臣等於本月二十七日督率官兵攻克道口賊

巢後查道口長八九里街道曲折敗殘餘匪逃

匿民房者雖被官兵用火燒斃一時未能淨盡

臣等於二十八日黎明又復嚴加搜捕尙有餘

匪四五百人當卽撥兵剿殺餘匪拚命逃回滑
縣縣城之賊不准其近城官兵正在追擊未及
二三里復有縣城東偏之桃源賊匪三千餘人
前來接應當經臣高杞率領官兵自東而西兩
路夾攻賊仍抵死抗拒桑吉斯塔爾格布舍揚
遇春楊芳等各帶馬步官兵縱橫衝突鎗箭齊
發賊始紛紛敗竄計臣那彥成一路殺斃賊匪

三百餘名高杞一路殺斃賊匪二百數十名賊

匪竄回桃源其道口餘匪臣等儘力追逐直抵

滑城詎城內之賊復出五六千人公然抗敵官

兵乘勝直前先用馬隊衝突該匪前隊折回官

兵趁勢追擊復斃賊匪七八十人賊衆退回城

內維時官兵前後各隊均已直逼城下正在剗

營賊匪復由西北二門突出每門約有二三千

人分投直撲臣等一面督兵截殺一面安劄營

盤隨將賊匪趕退入城立將東西南三門嚴密

堵住惟正北及西北兩門現在尚未堵住查滑

城周圍數里城郭完固統計現在兵數攻賊則

有餘圍城則不足臣等正在焦急計前調山西

兵一千名陸續到齊又臣那彥成前次續調陝

甘官兵未蒙

恩允惟臣係一面奏明一面先經檄調約計前次官

兵已出潼關不日亦可到營現在圍攻滑城正

當萬分喫緊之際擬卽分別派撥上緊攻取不

敢稍延時日再臣那彥成與高杞於二十八日

親赴道口鎮內查驗已斃賊匪該處屍骸枕藉

盈街滿屋實因官兵進攻道口之時注意剿殺

莫辨賊首賊夥屍身均已糜爛實無從查驗現

在臣等惟當加緊圍攻務擒首逆同桃源一股賊匪分撥官兵尅期撲滅諒此釜底游魂斷不能再稽顯戮再查此次賊匪滋事以來直隸河南兩省士民義切同仇自行團練壯勇捍禦殺賊並有捐輸錢米守衛城垣養贍窮民者現由該地方官陸續稟報前來臣那彥成覆加查核除殺賊不及百名無庸開單外謹將殺賊過百

名者繕具清單恭呈

御覽仍俟軍務告竣再行確查始終出力之人另行具

奏理合附陳

同日同興奏言查東省前此派撥滿漢兵一千名交蘇爾慎閔俊烈帶赴開州幫剿之後彼時徐州鎮總兵沈洪雖移赴考城旋因曹縣之大

寨集地方黃河水涸易於涉淺該鎮卽折回彼處駐紮不惟可以堵禦東南竄匪并可與東省曹縣一帶聲息相通是以臣復分兵往畢家集交多隆武陳廣寧等防堵茲據曹縣稟稱沈洪於二十六日接奉那彥成札調已於二十七日帶領全隊官兵前赴新鎮大營去訖臣查該處爲東南要地斷不可無兵正在飛札知會百齡

另行派兵防堵適據多武隆陳廣寧稟報在畢
家集拏獲賊探劉二番草王宗賢二犯訊據供
稱該犯俱從滑縣回來因河南官兵甚多朱成
貴等仍欲撲回山東令該犯等來探東省官兵
情形等語臣聞信之下不勝焦急查臣現帶之
兵并畢家集安陵集兩處紮營之兵止有二千
四五百名若大夥賊匪分股東竄實在不敷抵

禦邊防緊要除親督各處官兵加意嚴防外惟
有仰懇

皇上天恩卽飭那彥成速撥兵二三千名派員帶領
繞道斜趨由滑縣至東明扼要之處堵截庶免

闖入

同日馬瑜富蘭奏言查潘章西南另股之賊前
經我兵追壓去後探已潛遁楊家莊一帶臣等

卽帶兵前往截剿適該匪又奔滑縣是以臣等
仍由開州邊界從西北而至東南沿途搜捕現
在行抵中召據長垣縣周克家稟報縣境春亭
集李化字莊賊匪因有武生成晚蘭文童韓國
彥鄉民成長庚王成棟等率領鄉民時往攻擊
該匪無可覬覦陸續由西北滑縣逸去境內間
有餘黨已無大股賊匪又據東明縣朱煒稟報

縣境現俱寧謐惟開州東明長垣處處毗連滑
滑一經大兵剿散勢必四路奔逃臣等惟有加
倍嚴防不敢稍存大意均奏入

上命軍機大臣傳諭那彥成高杞楊遇春日那彥成
等奏官兵攻克道口後剿殺賊匪直抵滑城現在
布置圍攻所辦甚好道口攻克後餘匪尚有四五
百人復經官兵搜戮零星竄回滑城官兵乘勝追

擊先將桃源接應之賊截回追抵滑城城內賊匪
兩次出城衝撲俱經官兵擊退現在已將東西南
三面城門嚴密堵住惟正北西北兩門尚未堵合
看來賊匪勢已窮蹙此時緊要機宜必須四面圍
定方可併力進攻切不可於西北正北兩門未堵
合之先率行攻打致留賊匪奔竄之路若賊匪突
圍而遁必係悉其精悍乘間奔逃其老弱無用者

始棄之城中設官軍圍堵不嚴致有名賊目戰手
悉行免脫克城之後僅捕戮餘匪甚或多殺難民
充數則收復空城於剿捕大局何益乾隆年間庫
車前鑑具在慎之本日據同興奏沈洪一路官兵
經那彥成調赴大營東省兵備空虛現在訊據賊
供有河南官兵甚多賊目朱成貴等仍欲撲回山
東之語此時同興處防守之兵僅有二千四五百

名甚爲單薄若那彥成等不將滑縣賊匪就地殲滅倘賊匪乘虛竄往東省豈那彥成等又提數萬大兵移營東省另行籌辦乎此時陝甘官兵據奏已出潼關日內卽可到營正可補北面圍兵之不足那彥成等惟當督率將士合圍嚴密使賊匪無路遁逃先用大礮毀其垣壁我軍奮勇先登卽可將逆賊首夥或殲或擒一鼓全行掃蕩卽畧遲數

日朕亦不降旨飭催若使滑縣之賊再行散竄則
惟那彥成等是問至現在緊要賊目俱已聚集滑
城著那彥成等通諭將士於克城之日如李文成
徐安懶馮克善牛亮臣四犯必須按名擒獲擇其
傷輕者二名解京預備廷訊其傷重者卽在彼處
訊明正法錄供具奏在京滋事之要犯祝現劉第
五劉呈祥董伯旺克城時亦於活賊內嚴追如有

捕獲者全行解京以便歸案訊辦盡法懲治彼時
押解大員仍遵旨酌派長慶積德廣厚及慶祥等
率領侍衛將領等嚴密押送勿稍疎虞倘此等著
名賊目經官兵臨陣殲斃亦必須詳細辨認毫無
疑義一面戮屍梟示據實奏聞此八犯關係緊要
若伊等率據將士等稟報含混入奏將來該逆犯
又於他處拏獲則那彥成高杞楊遇春三人均不

能逃罪勉之慎之又那彥成奏直豫兩省堵禦出力士民名單該士民義切同仇各自團練鄉勇並捐輸錢米守衛城垣剿殺賊匪多名俱屬急公尚義可嘉奏到清單交軍機處存記俟軍務全竣時那彥成再將出力之人分別保奏候旨施恩又前日據那彥成等奏訊據賊犯劉成供稱有一總卦頭李姓在盧溝橋左近開張藥店有個當家的余

七同馮克善於八月進京並稱李姓係李文成之子等語昨密派英和在盧溝橋一帶查拏據奏拏獲開張藥鋪之李承慶余七二人訊問毫無影響著那彥成再向劉成研訊確切供詞據實覆奏

上又命軍機大臣傳諭托津日本日據馬瑜等奏察探直境開州一帶情形一摺披閱所奏該提督於前次接仗後其另股之賊遁往楊家莊復由彼奔

赴滑縣而長垣所屬春亭集等處因有武生成畹
蘭等率領鄉民時往攻擊又向滑縣逸去該提督
等帶兵在彼全未認真剿辦任聽賊匪往來游奕
僅以該州縣所稟敷衍入奏其油猾情形已可概
見托津現已馳抵開州著詳細確查若馬瑜等有
遷延觀望情事卽嚴叅具奏勿稍徇隱其開州東
明長垣一帶現在如尚有賊匪竄擾托津卽督率

各鎮將迅速掃除淨盡以清後路刻下那彥成等已將滑城圍困若能聚而殲旃固屬甚善倘有竄至直境之賊併當嚴密堵剿毋令旁逸本日又據同興奏拏獲賊探劉二番草王宗賢二犯訊據供稱賊目朱成貴等因河南官兵甚多仍欲撲回東省山東官兵經蘇爾慎等帶去一千名沈洪所帶之兵復經那彥成調赴大營東省現止存兵二千

四五百名邊防甚爲緊要托津現在開州逼近東
省邊界如探有賊匪東竄著托津卽酌分兵力派
委大員帶往山東幫助同興堵禦其北面直隸邊
界仍須嚴兵防範現在正當剿賊喫緊之際防賊
旁竄爲第一緊要機宜托津務周密佈置慎重調
度爲要

上又命軍機大臣傳諭百齡曰豫省賊匪經那彥成

等連次剿殺已將道口屯聚賊衆悉數殲擒本日據奏業將滑城圍困指日進攻該匪等若能聚而殲旃不留遺孽固屬甚善倘被剿情急豕突狼奔分投四竄亦不可不預爲防範東省界連江南地方最爲遼濶本日同興具奏訊據賊探供稱賊目朱成貴因河南官兵甚多仍欲撲回東省東省官兵前經蘇爾慎等已帶去一千名沈洪所帶之兵

復經那彥成調往大營東省防邊之兵僅存二千
餘名未免單弱百齡接奉此旨著卽酌派將領前
赴江南山東接壤處所協助同興併力防堵使賊
匪不能竄回東境則江境自安然無事該督務不
分畛域周妥佈置爲要

上又命軍機大臣傳諭同興曰同興奏訊取賊供賊
目朱成貴等因河南官兵甚多仍欲撲回東省等

語該匪等狡譎多端經豫省剿殺嚴急意圖東竄亦係必有之事東省兵力現在稍單不可不加意防範業經降旨令托津在開州一帶兼顧東面如有東竄之賊卽派兵速赴東省幫助同興堵禦其東南地方亦諭知百齡不分畛域可以派兵來東協防該撫惟當督率東省官兵嚴密防堵遇有竄來賊匪迎頭痛加剿戮毋稍疎虞爲要又據初彭

齡奏定陶以北城武鉅野鄆城等縣近日仍多土
賊數十人成羣搶奪村莊城武縣並有欽賜檢討
劉洙爲土賊頭目該縣土棍近年卽有紅磚會名
目晝伏夜動知縣不能剿捕僅放鄉間紳民逃避
入城閉門固守又兗州所屬嶧縣之常泥溝及沂
州所屬郟城之馬頭鎮均被土賊燒搶知縣不行
查辦等語山東曹縣定陶賊匪均已剿除淨盡而

附近州縣尚不免有土賊乘機燒搶著同興遴派
文武幹員前往各該處嚴密查訪果否有欽賜檢
討劉洙潛充賊目如實有其人卽拏獲究辦其焚
掠村莊之土賊並著督率地方官嚴拏重懲毋任
煽聚漸多擾害閭閻又滋事端

臣等謹按賊匪屯聚滑城外援俱絕固已納
諸陷穽之中而豕突狼奔鋌走實爲可慮那

彥成等乘道口之勝進軍城下是時兵盛氣
壯似無難一鼓而登滅此朝食然長圍未合
尚留西北正北兩門使其悉精銳而行遺空
城而去則是熏狐未得何言灌穴之功脫免
難追終蹈守株之誤從此賊勢散漫辦理必

至棘手我

皇上智炳幾先慮周閭外

特勅那彥成等必須四面堵合方可併力進攻猶慮
進攻之時潰圍不免

諭令臣托津嚴防北面兼顧東省又

敕百齡協助東省防堵兼顧江南其西面太行山麓
則早

命張績駐守蓋不特環攻無缺而重圍密佈更有週
乎數千里之外者是以滑城一克賊黨盡殲

無能軼乎

天網蕪功完善

機要實決於斯時也

是日

上諭內閣曰御史嵩安等奏酌籌內城編查保甲事宜請交步軍統領衙門核辦一摺內城地面向係步軍統領管轄舊有十家戶名目卽仿照保甲規

制核實編查較爲簡易所有內城旗民戶口編查保甲事宜著專責成步軍統領衙門認真妥辦毋稍遲緩此內除王公滿漢文武官員三品以上者令其自行查察外其四品以下職官均與旗民一體編查有陞任三品者隨時具報開除

同日章煦奏言

臣 欽奉

諭旨將山海關獲犯李得水所供長垣縣被賊擾害

各情形查明具奏臣遵卽將直隸總督衙門自

本年四月以後各屬所投文稟及溫承惠批行

稿案逐細檢查並無長垣縣稟報河南太康縣

匪徒聚集多人在各村莊搶掠於九月初進城

劫庫戕官之件復面詢臬司慶格清河道魯銓

保定府知府張五緯等咸稱毫無影響至長垣

縣知縣趙綸係於九月初六日出城赴葦園村

查拏教匪被戕並非在署被殺縣城及倉庫等項均未被賊攻陷刼取獄囚並未放走彼時亦無官兵剿殺賊衆一千餘人之事李得水所供似未確實謹據實覆奏

同日福長安奏言本月初二日申刻

臣

接據文

武委員遊擊花良阿員外郎吉隆阿等稟報將曹綸父子鎖拏管押解京並查抄該犯任所貲

財字跡各情謹將該員等原稟及查抄物件清單一併恭呈

御覽臣復面詢遞稟來弁鎖拏曹綸時該犯是何形狀獨石地方有無別項聲息據稱曹綸伏地受縛地方亦極寧靜等語均奏入報

聞

十一月初四日丁卯托津奏言竊臣欽奉

諭旨馳赴開州剿辦後路賊匪伏思進兵之要必須
通盤計議相度地勢之遠近以定剿捕之後先
方克師貞有濟當向藩司素納詳細諮詢悉心
籌酌就開東長地勢而論開州之正西及西南
西北與河南滑縣密邇毗連東明在開州之東
南長垣又在東明之西南長垣北界與滑縣東
南界接壤是長垣雖隸直省其地轉在滑縣之

南距開州較遠查現在東明境內並無賊匪滋
擾開州各村莊亦無賊匪盤踞因西界與滑縣
潘章等村犬牙相錯時有賊匪竄入開境出沒
無常從前長垣之春亭集文興集南岳集等處
原有賊匪盤踞近因自衛村莊之壯勇時往攻
擊該匪等均向滑縣遁去長垣境內亦無大股

賊匪

臣接奉

論旨剿捕北路一帶此時若帶兵徑往長垣殲剿轉
須遶赴南面向北進攻且近日那彥成疊獲勝
仗攻克道口進圍滑城賊匪漸已窮蹙勢必紛
紛四竄滑縣東界濬縣北界皆與開州毘連是
開境爲北路最要之地亟宜防堵截剿馬瑜等
所帶兵數僅三千餘名祇敷堵截臣現已遣人
迎催吉林黑龍江官兵迅速前赴軍營一俟該

官兵到開後除留弁兵在開州嚴密防守外

臣

卽督率馬瑜富蘭等分領勁旅由北而南相機
兜剿不難一鼓撲滅如此辦理既能扼其北竄
之路而於剿捕機宜尤爲得手謹將直豫之滑
濬開長等處地勢方向繪圖恭呈

御覽臣於拜摺後星卽迅赴開州軍營以圖進剿奏

入

上命軍機大臣傳諭托津曰直隸長垣地界係在滑縣之東南此時托津若帶兵徑赴長垣轉須繞南面向北進攻托津審擇地勢在開州扼要之處督率堵剿所見甚是現在那彥成連獲勝仗攻克道口進圍滑城倘賊匪被剿情急稍有竄逸滑濬地方皆與開州連界爲北路扼要之地托津應於此處駐紮大營相機堵截昨同興奏因賊犯有撲回

東省之供山東兵力較單奏請添兵協防若將逆
剿之兵移駐防守殊覺無益托津駐紮開州著探
明逸賊向何方奔竄卽派兵由何方迎頭截擊緊
顧北面并可兼防東面著卽知會同與彼此偵探
互相應援同與現在曹州雖距開州一百數十里
聲氣易於聯絡也

是日

上諭內閣曰此次審辦逆案之堂司各官晝夜研鞫
不辭勞瘁能將緊要逆情逐一究出甚爲出力刑
部堂官除宋鎔現有失察處分外尚書崇祿韓封
著各賞給貂皮褂一件侍郎穆克登額成格著各
賞狐肱褂一件其軍機章京及刑部司員等列爲
一等者十七員著每員賞給大卷八絲緞一疋縐
綢一件列爲二等者六員著每員賞給小卷八絲

緞二件以示鼓勵

上又諭內閣曰宋鎔初彭齡前在順天府尹任內均失察林清等傳習邪教宋鎔在任已逾三年著交部嚴加議處初彭齡在任僅止四月有餘著交部議處曹振鏞前署兼管順天府府尹帥承瀛前署順天府府尹其任內失察林清等傳習邪教均僅一月有餘曹振鏞帥承瀛俱著交部議處

上又諭內閣曰成寧前在霸昌道任內失察林清傳習邪教爲期僅五月有餘其失察林清謀逆僅止數日著交部議處前任霸昌道士俊失察首逆林清傳教謀逆在任二年有餘著交部嚴加議處現任霸昌道誠端失察不及一月著交部議處

是日

乾清門侍衛福勒洪阿阿蘭保督同直隸委員同

知明順遊擊花良阿等將曹綸一犯鎖拏到京
得

旨軍機大臣會同刑部嚴訊其管解曹綸進京之員
弁兵役賞給緞疋銀鏹有差

十一月初五日

戊辰

上諭內閣曰恭值

南郊大祀朕先一日宿

壇定例由宮內乘輦陳設大駕鹵簿禮儀明備本年禁
城內九月十五日之變仰賴

上蒼垂佑渠魁立殲餘黨悉除其豫東賊匪派兵剿辦
連奏捷音冀可計日蕩平前曾於孟冬之朔派儀
親王永璇告祭

天壇朕沐非常

昊睨夙宵欽感尚未躬達悃忱茲於長至日恭祀

園丘肅陳祇謝虔籲

恩慈敬當減損儀文用昭寅畏其前一日詣

壇不御輦由宮內詣

皇穹宇以至進齋宮俱乘紅桿八人轎大駕鹵簿毋庸

陳設祭日禮成還宮設騎駕鹵簿奏導引樂著該

衙門敬謹遵照預備

是日董誥等奏言臣等連夜熬訊曹綸一犯據

供我是正黃旗漢軍年四十二歲曾祖曹金鐸
係驍騎校伯祖曹瑛曾任工部侍郎補放大同
鎮總兵祖曹城原任雲南順寧府知府父曹廷
奎原任貴州安順府同知嘉慶二年在署南籠
府任內因苗匪圍城痰發身死我嫡母荆氏生
母孫氏亦俱自縊其時無人呈報未得

旌表我叔叔曹廷琦又兄弟三人內長兄曹紳已故

祇有二兄曹維現充武備院弓匠均已分居妻
楊氏生子三人長男幅昌次男重慶三男鶴齡
女姪兒我先於乾隆五十八年充整儀尉陞治
儀正兼公中佐領嘉慶十六年陞獨石口都司
前此乾隆五十五年我在父親高郵州任內彼
時林清充當糧道長隨往高郵州查漕與我識
認嘉慶十二年三月有素識的宋三同著林清

來看我其時我衣服藍縷不能出門當差林清
給我贖了幾件棉衣約用京錢二十六千文四
月初間宋三將我請到南城外椿樹二條衚衕
他的家中彼時林清季得全俱在座宋三對我
說你現在當差艱難我們四人何不結拜兄弟
後來大家好幫助你我就應允當日彼此磕了
頭是年林清曾著董懶太送過我西瓜木炭十

三年我隨熱河圍林清送我馬一匹騾一頭京錢五十千文是年十月我因賣房與王柄家涉訟與伊家人王五讖認往來相好至十四年十一月我又與王五結拜是年春圍林清又幫過京錢四五十千文他十三年冬間並十四年夏間往城外拉米我曾用圖記送米出城說是兵丁食米十六年三月我陞了獨石口都司到林

清家對他說我從前所借的錢文驛馬不能還
你林清說那都不要緊我教你一個法兒可以
趨吉避凶並可救窮我問是甚麼法兒他傳授
我真空家鄉無生父母八字叫我打坐默誦我
卽應允後來我就到任去了是年五月我因領
餉進京有孫九劉三卽劉幅受到我家說他們
前往獨石口找我說話聽見我業已進京就趕

回來我對孫九們說林三哥教我念八個字可
以救窮並無效驗孫九說你要效驗除非給林
三哥磕頭他們又叫我著人去請王五來說話
我就打發我大兒子幅昌請王五來到我家孫
九劉三對我說河南七卦人都已歸了林清目
下劫數已到林清該當起事彼時你若可以進
京就來京幫助若不能來就在獨石口收人入

會我說不能進京只好在那裏看光景罷了孫
九說既不能來將來事成再差人接你罷後來
各人走散我就往良鄉接餉去了十七年五月
我又領餉進京到林清家中我依着孫九的話
給林清磕頭林清只舉手並不還禮那時劉三
卽劉幅受劉四卽劉呈祥並已故的田大都在
林清家中我就問林清說你們的事到底怎麼

樣林清說時候尚未到等時候到了我就差人
接你本年七月我護送土爾扈特上熱河在彼
守候迨送土爾扈特出境至九月十三日始回
獨石口衙門聽說京中有劉姓來找我未遇就
回去了十四日我聽見河南滑縣有賊造反就
知道必是林清的人我當初原因窮苦借過林
清驛馬錢文又恐斷絕往還伊必逼索所以聽

從入教至林清們平日謀逆情事我俱稔知因我積年欠帳甚多林清曾許我事成後替我還清賬目我想那時別的好處固不必說就免了眼前這樣苦累也是好的這實是我窮極無奈糊塗該死的想頭至他們要我收人入會我雖當時應允後來越想越怕實未收人迨九月十五日林清派人進京鬧事我因出差並未得信

總之我家世受

國恩我又蒙

皇上天恩身任都司幹出這樣事來實屬禽獸不如
罪該萬死無可再說等語查該犯所供恐尚有
不實不盡之處容再研訊奏

聞

上又諭內閣曰逆犯林清滋事一案該逆勾引夥匪

皆先以財利引誘入教久乃商謀逆情該逆等並
非無業之人著直隸總督順天府尹將此案審明
首從各逆犯如林清曹綸等按照旗籍將各名下
叛產悉行籍沒入官其每年應得租銀若干詳細
造冊報部歸入旗租項下以備每年加賞八旗兵
丁之用

同日馬瑜富蘭奏言竊臣等於十月三十日行

抵中名將開東長各境內竄匪情形具

奏後旋據探報緊接開州邊界之滑縣袁家莊有

賊匪藏匿_臣等星卽帶領滿漢官兵一千名前

往奮勇剿殺該匪猝不及備當被生擒九名殺

斃賊匪三十餘名燒斃七八十名餘向四間房

竄去初一日正欲帶兵往剿探報西南有賊匪

一股約有一千四五百人遠逼大營而來_臣富

蘭閏俊烈帶領協領哈哈岱佐領成順防禦訥

勒賀候補遊擊班荆布都司桂朝陽伏於營盤

偏左臣馬瑜蘇爾慎帶領巴圖魯侍衛吉勒章

阿護軍叅領福英阿委護軍叅領色爾果善降

調副將馬文斌守備王正綱等伏於營盤偏右

少頃賊匪吶喊搖旗施放鎗礮果來撲營營內

各兵視賊較近鎗礮齊發斃賊三四十名賊匪

猶竭力抗拒爾時臣等帶兵抄出營前兩路奮力掩殺箭射矛戳又斃一百餘人該匪不能抵敵始行敗退我兵乘勝緊追十餘里又殺賊三百餘人搶獲大小礮五尊刀矛一百五十四件白旗二十四面大車二輛內裝賊衣乾糧火藥鎗礮子等物餘匪四散有竄入趙管李家莊者二百餘人隨又分兵跟剿並派守備陳祥禧千

總邢雲漢郭連把總周廷獻外委柯彪等帶領
兵丁放火焚燒殲洗淨盡前後共生擒賊犯劉
保義等七十一名訊據劉保義供係滑縣人被
四間房頭目兌宮伯魏德鍾裹脅入夥此股共
有二千餘人昨日小頭目楊全有管帶二百多
人在袁家莊屯聚被官兵燒殺一百餘人楊全
有逃往四間房求救魏德鍾因此來尋官兵打

仗報仇今已敗走等供當與各犯一併正法此
次打仗直隸兵丁王成龍張立德均受鎗傷俟
咨部照例核辦現在賊匪尙有散處村莊者臣
等已飭令分投確探惟有鼓勵將士向南截剿
勿任北竄奏入

上命軍機大臣傳諭托津日本日接據馬瑜等奏連
獲勝仗一招馬瑜節次在開州以南接近滑縣境

內搜剿賊匪俱有殲捕看來該處零星賊股仍尙不少托津此時已到開州當督率馬瑜等逐一搜捕迅速殲除淨盡現在那彥成等攻圍滑城恐城破之後賊匪亡命奔潰直隸開州一帶與滑縣處處毗連托津等當由北向西南節節堵剿遇有滑縣成股竄逸之賊務當迎頭截擊無任一名免脫卽或有逃出難民亦須加意盤詰勿使改裝假冒

避過大兵得以北竄此爲至要